

Pakar HQE II, UMS jalankan pembedahan otak secara sedar

UB 14.08.2024 P.02



BEDAH: Pasukan perubatan HQE II dan UMS berjaya menjalankan pembedahan otak secara sedar ke atas pesakit yang mengalami kecederaan otak traumatik.

KOTA KINABALU: Pakar bedah otak dari Hospital Queen Elizabeth (HQE) II dan pakar bius otak Universiti Malaysia Sabah (UMS) berjaya melakukan pembedahan otak secara sedar ke atas seorang pesakit lelaki berusia 88 tahun yang mengalami kecederaan otak traumatik (TBI), baru-baru ini.

Ketua Jabatan dan Perunding Pakar Bedah Saraf HQE II, Dr. Mohd Sofan Zenian dalam satu kenyataan berkata, pesakit lelaki itu mengalami kecederaan apabila terjatuh ketika berjalan kaki di taman perumahannya dua minggu lalu dan mengalami pendarahan subdural kronik kiri yang besar (SDH).

“Akibatnya, beliau mengalami sakit kepala yang teruk, penglihatan kabur, pertuturan yang tidak jelas

dan lemah badan di sebelah kanan.

“Memandangkan fungsi sarafnya semakin merosot, kami segera menghantarnya ke dewan bedah untuk menjalani mini kraniotomi bagi mengalirkan darah beku yang lama,” katanya.

Beliau berkata, pembedahan secara sedar adalah untuk menilai fungsi sarafnya secara intraoperatif, yang bertambah baik berikutan pengaliran kira-kira 30ml beku darah, dan pesakit difahamkan pulih sepenuhnya.

Sementara itu, Pensyarah Kanan dan Pakar Neuroanaestetik dari Fakulti Perubatan dan Sains Kesihatan (FPSK) UMS, Dr. Yeap Boon Tat memaklumkan pembedahan mini kraniotomi secara sedar kepada pesakit yang juga mengalami penyakit

kardio-pernafasan, adalah tepat pada masanya.

“Prosedur ini akan mengelakkan daripada kesan sampingan pembiusan secara tidur dan mengurangkan keperluan pesakit untuk dimasukkan ke unit rawatan rapi (ICU).

“Ini juga penting untuk mengurangkan kadar jangkitan penyakit nosokomial di ICU,” katanya.

Dalam pada itu, Naib Canselor UMS, Prof. Datuk Dr. Kasim Mansor dalam satu kenyataan merakamkan penghargaan ke atas HQE II atas kepercayaan yang diberikan kepada UMS untuk bekerjasama dalam pembedahan otak tersebut.

“Pihak UMS amat teruja dan berterima kasih kepada pasukan neurosurgeri dari HQE II atas kerjasama yang baik dengan UMS untuk

memastikan kemajuan dalam pembedahan otak, saraf dan pembiusan dapat memberi manfaat kepada rakyat Sabah.

“Saya difahamkan ini adalah kali ketiga UMS berjaya bekerjasama dengan pasukan HQE II dalam melakukan pembedahan otak secara sedar di Sabah dengan dua pembedahan terdahulu iaitu pesakit dengan ketumbuhan di otak (brain tumor),” katanya.

Dekan FPSK UMS, Datuk Dr. Mohd Yusof Ibrahim berkata, pihaknya berharap lebih banyak kemajuan dalam penjagaan neurosurgical dan neurokritikal, seperti ‘brain suite’ dapat diberikan kepada hospital di Sabah, khususnya Hospital Universiti Malaysia Sabah (HUMS), untuk memberi manfaat kepada rakyat Sabah.